

METODOLOGI PENULISAN ZAGHLUL AL-NAJJAR DALAM MENGANALISIS TEKS HADITH NABAWI MELALUI DATA-DATA SAINTIFIK

Ishak Suliaman¹, Mohd Afifuddin Mohamad², Raihana Abdul Wahab³,
Siti Rabiatul Adawiyah S.Mohsain², Sumaiyah Mohd Tamizi².

Abstrak

Metodologi penulisan Dr Zaghlul al-Najjar dalam bukunya, ‘al-I’jaz al-‘Ilm fi al-Sunah al-Nabawiyyah’ sebanyak 3 jilid telah memberikan impak baru terhadap penulisan Sharh al-Hadith atau analisis teks Hadis Nabawi melalui paparan data-data saintifik. Di dalam penulisan bukunya, beliau tetap mengaplikasikan metode klasik muhaddithin di dalam Sharh al-Hadith yang mengutamakan aspek autoriti teks melalui metode takhrij dan aspek kefahaman teks Hadith melalui metode fiqh al-Hadith yang memfokuskan terhadap aspek kefahaman istilah dalam Bahasa Arab, wurud al-Hadith dan fiqh hukum daripada teks Hadith. Metode baru yang diaplikasikan oleh Dr Zaghlul al-Najjar ialah menganalisis teks Hadith Nabawi melalui data-data saintifik. Justeru, kertas kerja ini akan memaparkan metode pembaharuan yang diaplikasikan oleh Dr Zaghlul al-Najjar di dalam bukunya al-I’jaz al-‘Ilm fi al-Sunah al-Nabawiyyah dari aspek data-data saintifik.

1.0 Pengenalan

Trend penulisan dan kajian yang mengharmonikan sains dan Islam ini bermula dengan penulisan buku *La Bible, le Coran et al la science* yang ditulis oleh Maurice Bucaille pada tahun 1976. Buku tersebut telah diterjemahkan kepada pelbagai bahasa dan mendapat sambutan yang cukup menggalakkan daripada pembaca. Bermula dari itu, buku-buku yang membawa tema yang sama mendapat sambutan yang baik. Penulis-penulis lain yang turut membina nama dengan menulis buku-buku seperti ini ialah Harun Yahya (Turki), Danial Zainal Abidin (Malaysia), Arip Kosmo (Malaysia) dan ramai lagi.⁴ Buku *al-I’jaz al-‘Ilm fi al-*

¹ Prof Madya di Jabatan al-Qur'an dan Hadith, Akademi Pengajian Islam, Universiti Malaya.

² Calon sarjana di Institut Pengajian Siswazah, Universiti Malaya.

³ Calon Doktor Falsafah, Akademi Pengajian Islam, Universiti Malaya.

⁴ Shaharir Mohd Zain (2010). Ulasan buku : Laris, Terhiris dan Tergores : Ulasan Buku Qur'an Saintifik Karya Dr. Danial Zainal Abidin . Osman Bakar, Azizan Baharuddin, Amran Muhammad,

Sunah al-Nabawiyyah ini merupakan buku yang membawakan tema yang sama iaitu pengharmonian antara sains dan hadis. Namun begitu, pembaharuan yang dibawakan oleh penulis ialah menganalisis teks Hadith Nabawi melalui data-data saintifik yang mana sebelum ini, kebanyakan penulis lebih tertumpu kepada mengemukakan data saintifik dalam menginterpretasikan ayat-ayat al-Qur'an. Justeru, objektif kajian ini ialah untuk menganalisis sumber-sumber hadis yang digunakan seterusnya mengemukakan kekuatan dan kelemahan buku ini. Objektif kedua adalah untuk menganalisis kaedah yang digunakan dalam mengharmonikan hadis dan sains.

1.1 Biografi penulis⁵

Zaghoul El Naggar merupakan seorang Ilmuwan Islam yang memegang jawatan sebagai Pengurus Jawatankuasa Sains di Dalam al-Qur'an, Majlis Tertinggi Hal Ehwal Islam, Kaherah, Mesir. Beliau merupakan Profesor dalam bidang Sains Kajibumi dan Geologi. Beliau memperoleh Ijazah Doktor Falsafah daripada Universiti Wales, United Kingdom pada tahun 1963. Beliau dilantik sebagai Fellow di Akademi Sains Islam pada tahun 1988. Beliau juga merupakan ahli Persatuan Geologi London, Persatuan Geologi Mesir, dan Persatuan Ahli Geologi Petroleum Amerika, Tulsa, Oklahoma. Beliau telah menerbitkan lebih daripada 150 kajian sains dan artikel dan juga 45 buah buku yang ditulis dalam bahasa Arab, Bahasa Inggeris dan Bahasa Perancis. Kebanyakan penerbitan beliau adalah berkaitan dengan keajaiban sains dalam al-Qur'an.

1.2 Pengenalan buku

Judul asal buku ini ialah *al-Ijaz al-Ilmi fi al-sunnah al-nabawiyah*. Kertas kerja ini akan mengemukakan analisis yang dibuat terhadap terjemahan buku ini dalam Bahasa Melayu yang diberi judul Keajaiban Sains Dalam Hadis. Buku ini telah diterjemahkan oleh Nor Hasanuddin dan Faisal Salleh dan disemak oleh Mohd Khairul Nizam bin Zainan Nazri dan Ustaz Muhammad Sabri Sahrir. Buku ini diterbitkan oleh Al-Hidayah Publication. Buku setebal 591 muka surat ini merangkumi tiga bahagian (tiga jilid) yang mengandungi 73 topik dengan bahagian satu 28 topik, bahagian dua 25 topik dan bahagian tiga, 20 topik.

2.0 Analisis topikal

Di dalam buku beliau, Dr. Zaghoul al-Najjar tidak menyusun sub topik ini secara sistematik mengikut tema. Justeru, kertas kerja ini telah mengklasifikasikan topik-topik ini mengikut tema. Dalam 73 topik yang terkandung di dalam buku ini, terdapat tiga tema utama yang diketengahkan oleh penulis, tema pertama ialah

Fauzi Hamat, Azhar Md. Aros dan Ibrahim Ismail (ed.). Jurnal Peradaban, jil.3, hal 99. Universiti Malaya : Kuala Lumpur.

⁵ Diambil dari http://en.wikipedia.org/wiki/Zaghoul_El-Naggar pada 24 Mei 2011.

mengenai alam semesta, tema kedua mengenai penciptaan makhluk dan tema ketiga mengenai kesihatan.

2.1 Alam Semesta

Terdapat 22 topik yang memaparkan hadith yang berkaitan dengan alam semesta. 22 topik ini boleh dibahagikan kepada sub topik berikut :

- Astronomi⁶
 - Tujuh Lapisan Bumi Lapisan Perut Bumi
 - Gerhana matahari dan bulan
 - Bintang-bintang sebagai penyelamat langit
 - Keberkatan besi, api, air dan garam
 - Mukjizat Rasulullah berupa bulan terbelah
 - Melihat anak bulan
 - Bumi berbentuk bulat
 - Proses pembentukan bumi
 - Kaabah adalah pusat alam semesta
 - Pertukaran tahun
 - Dahulu yang ada hanya Allah dan tidak ada sesuatu selainNya
- Astrologi⁷
 - Masalah –masalah sihir dan tilik
- Meteorologi⁸
 - Hujan merupakan curahan rahmat Ilahi
 - Kitaran hujan
 - Waktu hujan turun
- Geologi⁹
 - Kandungan laut yang menyala
 - Gunung sebagai pasak bumi
 - Kawasan subur di Padang Sahara
- Fenomena alam (fenomena yang berkaitan dengan hari kiamat)

⁶ Ilmu falak (pengetahuan tentang bintang-bintang yg melibatkan kajian tentang kedudukan, pergerakan dan perkiraan serta tafsiran yg berkaitan dgn bintang). Rujuk Noresah Ibrahim

⁷ Ilmu nujum (ilmu peramalan sesuatu berdasarkan kajian bintang-bintang).

⁸ Sains tentang atmosfera dan fenomenanya.

⁹ Sains tentang asal usul, sejarah, struktur, dan komposisi bumi, kaji bumi.

- Kiamat dan negeri Arab
- Matahari terbit dari barat
- Munculnya api dari Hijaz
- Lipatan langit pada hari kiamat
- Tanda-tanda hari kiamat

2.2 Penciptaan Makhluk

Terdapat 25 topik yang memaparkan hadith yang berkaitan dengan alam semesta. 22 topik ini boleh dibahagikan kepada sub topik berikut :

- Embriologi¹⁰
 - Kewujudan sperma
 - Fasa-fasa penciptaan manusia
 - Waktu peniupan roh ke dalam janin
 - Tulang ekor
 - Kebangkitan semula dari tulang ekor
- Arkeologi¹¹
 - Adam a.s adalah makhluk yang terakhir diciptakan
- Fisiologi¹²
 - Keajaiban tulang sulbi manusia
 - Kewujudan hati
 - Kaitan anggota tubuh
 - 360 sendi dalam tubuh
- Genetik¹³
 - Penciptaan Adam a.s¹⁴
 - Pengaruh genetik
 - Penciptaan Adam a.s dengan rupa wajahnya tersendiri
 - Pengambilan sumpah terhadap anak keturunan Adam

¹⁰ Salah satu cabang ilmu perubatan yg mengkaji perkembangan embrio.

¹¹ Kajian saintifik mengenai sesuatu kebudayaan (terutama kebudayaan prasejarah) dgn cara penggalian dan penghuraian kesan-kesan tinggalannya, kaji purba

¹² Proses dan fungsi keseluruhan atau sebahagian drpd sesuatu organisme

¹³ Kajian tentang keturunan (baka), dan cara individu mewarisi sesuatu ciri (sifat), dan memindahkan ciri tersebut drpd satu generasi kpd generasi lain melalui gen atau kajian berkenaan pembiakan, kelahiran, atau asal usul sesuatu.

¹⁴ Topik yang sama diulang dalam dua jilid yang berbeza, iaitu jilid II dan III. Walau bagaimanapun penerangan dan hadith yang dikemukakan adalah berbeza.

- Menisbahkan setiap bayi kepada Nabi Adam
- Sifat tua dan nenek moyang diwarisi generasi selanjutnya
- Pengaruh gen nenek moyang
- Daripada ibu dan bapa, anak diciptakan
- Tidak semua sperma menjadi anak
- Sperma yang sempurna dan yang belum sempurna penciptaannya
- Penentuan sifat janin dan jantinanya merupakan perintah Allah
- Ketentuan kemiripan wajah anak
- Ketentuan jantina janin
- Apa yang ditakdirkan tercipta pasti tercipta

2.3 Kesihatan

Terdapat 23 topik yang memaparkan hadith yang berkaitan dengan alam semesta. 23 topik ini boleh dibahagikan kepada sub topik berikut :

- Perawatan dan penyakit
 - Penyakit dan ubat
 - Penawar dan penyakit pada sayap lalat
 - Terapi berubat dengan bekam
 - Khasiat cendawan
 - Dimakruhkan tidur sebelum Isyak dan bersempang-sempang setelahnya
 - Berwaspada terhadap penyakit lembu gila
- Kebersihan
 - Perbuatan zina dan wabak penyakit bermaharajalela
 - Fadhilat memakai siwak
 - Hidup bersih dan suci
 - Sunah-sunah fitrah
- Pemakanan (nutrisi)
 - Fadhilat meminum air zamzam
 - Fadhilat buah tamar
 - Ibadah puasa dan kesihatan
 - Fadhilat habbatus sauda'
 - Fadhilat zaitun


- Keutamaan cuka
- Khasiat senna dan sannut
- Khasiat bubur gandum
- Khasiat hulbah
- Khasiat biji ‘adas
- Larangan memakan daging dan susu haiwan yang memakan kotoran
- Khasiat buah tin
- Khasiat buah delima
- Menyusukan anak
- Pengharaman memakan daging haiwan yang bertaring dan bercakar

Jadual 1-3 : Analisis pola penulisan berdasarkan topik

Tema	Alam semesta				
	Astronomi	Astrologi	Meteorologi	Geologi	Fenomena Alam
Bilangan subtopik	11	1	3	3	5

Tema	Penciptaan makhluk			
	Embriologi	Arkeologi	Fisiologi	Genetik
Bilangan subtopik	5	1	4	14

Tema	Kesihatan		
	Perawatan dan penyakit	Kebersihan	Pemakanan (nutrisi)
Bilangan subtopik	6	4	15



Carta 1: Pola penulisan mengikut tema

Daripada carta palang di atas, bidang yang ditumpukan oleh penulis ialah astronomi, genetik dan juga pemakanan. Penulis merupakan seorang Profesor dalam bidang geologi, namun begitu kepakaran beliau dalam mengulas bidang-bidang lain terbukti dengan kepelbagaiannya topik yang dibincangkan dalam buku ini.

3.0 Analisis Metodologi

3.1 Metodologi Ulasan Hadith

Hadith-hadith yang digunakan sebagai hadith utama kebanyakannya di ambil daripada sumber *Sunan Tis'ah*. Berdasarkan analisis yang dibuat, terdapat tiga kaedah yang digunakan oleh penulis dalam mengulas sesuatu topik. Iaitu :

3.2.1 Contoh Ulasan Berdasarkan Fakta Sains (Dinyatakan Sumber)

Ulasan hadith yang disertakan hujah-hujah sains yang dilakukan oleh penulis merupakan satu ulasan yang baik. Penulis mengemukakan fakta-fakta yang bersesuaian, sebagai contoh dalam topik Penawar Penyakit Pada Sayap Lalat, penulis telah mengemukakan kajian yang telah dilakukan oleh Kerajaan Arab Saudi iaitu:

Sejumlah gelas yang mengandungi air, madu dan bermacam jenis minuman dibiarkan terbuka supaya lalat jatuh ke dalamnya. Pada sebahagian gelas itu lalat yang jatuh ditenggelamkan dan pada gelas yang lain tidak ditenggelamkan.

Hasil ujian menunjukkan bahawa pada minuman yang tidak ditenggelamkan lalatnya penuh dengan kuman dan organisma mikro. Sedangkan pada minuman yang ditenggelamkan lalatnya hampir-hampir bersih daripada kuman dan organisma mikro.

Penulis turut mengemukakan pandangan pakar seperti di dalam topik ini, penulis mengemukakan pandangan Dr. Khalil Mulla Kathir yang menulis buku *al-Isabah fi Sihhah Hadith al-Dzubabah* (Kesahihan Hadith Tentang Lalat).

Contoh kedua, dapat dilihat melalui topik ‘Kaitan anggota tubuh’. Hadith yang dikemukakan oleh penulis ialah :

“Perumpamaan orang-orang yang mukmin dalam bersaudara, berkasih sayang, dan bersimpati di antara sesama mereka sama seperti satu tubuh yang apabila salah satu anggota tubuh mengeluh sakit maka seluruh anggota tubuh yang lain saling merasainya dengan tidak dapat tidur dan demam.”

(HR Bukhari, Muslim, Ahmad)

Mengenai topik ini penulis mengambil pendapat Dr. Mahir Muhammad Salim :

“Keluhan organ tubuh yang merasa sakit merupakan keluhan yang nyata bukan kiasan. Sebab, denyutan-denyutan saraf deria langsung bertolak daripada tempat yang sakit seperti meminta pertolongan kepada pusat-pusat indera dan tindak balas di dalam otak...”

3.2.2 Contoh Ulasan Berdasarkan Ayat Al-Qur'an Dan Fakta Sains

Contoh ulasan berdasarkan ayat al-Qur'an dan fakta sains adalah dalam topik ‘Gunung sebagai pasak bumi’. Sabda Baginda s.a.w:

Sebaik sahaja Allah telah menciptakan bumi, bumi bergoyang, Allah kemudian segera menciptakan gunung-gunung itu: “Jadilah dan menetaplah di atasnya, bumi pun menjadi tenang”

(HR Imam Tirmizi dan Ahmad)

Hadis ini juga dijelaskan oleh sepuluh ayat al-Qur'an yang mengukuhkan peranan gunung sebagai pasak bumi iaitu Surah an-Naziah:32-33, ar-Ra'd:3, al-Hijr:19, an-Nahl:15, al-anbiya':31, an-Naml:61, Luqman:10, Fussilat:10, Qaf:10, al-Mursalat:27.

Selain daripada itu penulis telah membawakan dua fakta saintifik yang penting dalam menerangkan hadis ini iaitu pada lapisan dalam bumi, arus panas berputar sangat kuat dan aktif dan mendorong lempengan kerak batuan bumi untuk bergerak menjauhi atau bercantum antara satu sama lain dan di sinilah peranan gunung dalam menghentikan gerakan lempengan kerak batuan. Paksi bumi

bergoyang dan bergerak dan gunung mampu meminimumkan goyangan paksi putar bumi dan menjadikannya lebih teratur.

Contoh kedua dapat dilihat dalam topik ‘Hujan merupakan curahan rahmat Ilahi’. Hadis yang sama dengan sanad yang berbeza yang dibawakan bermaksud hujan yang diturunkan oleh Allah membawa rahmat dan anugerah kepada manusia dan manusia yang mengakui hujan itu membawa rahmat tergolong dalam golongan yang beriman. Hadis ini dijelaskan lagi dengan ayat-ayat al-Qur’ān, iaitu Surah al-A’raf:57, al-Hijr:22, al-Baqarah:21-22, al-An’ām:99, Thaha:53, al-Mukminun:18, dan al-Furqan:48. Ayat-ayat tersebut menjelaskan lagi bentuk rahmat yang dianugerahkan Allah melalui hujan antaranya sebagai air minuman serta dengannya Allah menumbuhkan buah-buahan serta tumbuh-tumbuhan.

3.2.3 Contoh Ulasan Berdasarkan Hadith Dan Fakta Sains

Contoh ulasan berdasarkan hadith dan fakta sains pula ialah di dalam topik ‘Tujuh Lapisan Bumi’. Penerangan adalah berdasarkan 6 hadith yang dikemukakan. Hadith – hadith tersebut secara umumnya menerangkan membuat kezaliman dalam bentuk merampas tanah orang lain. Azab yang diterima adalah akan dibenamkan ke dalam tujuh lapisan bumi. Fakta sains astronomi dan kajian geologi menunjukkan bahawa lapisan bumi terdiri dari tujuh lapisan.

Tujuh Lapisan itu terdiri daripada:

1. Lapisan Dalam Teras Bumi (Solid Inner Core)
2. Lapisan Luar Teras Bumi (Outer Core)
3. Lapisan Bawah Mantel (Lower mantel)
4. Lapisan Tengah Mantel
5. Lapisan Teratas Mantel (Upper Mantel)
6. Lapisan Bawah kerak Bumi
7. Lapisan Atas Kerak Bumi

Contoh kedua dapat dilihat melalui topik ‘Gerhana Matahari dan Bulan’. Terdapat sejumlah hadith yang menyatakan tentang kejadian gerhana matahari dan bulan. “*Sesungguhnya matahari dan bulan adalah dua tanda kebesaran Allah dan keduanya tidak ada gerhana kerana kematiian seseorang mahupun kerana kelahirannya.*” Dalam memberi keterangan tentang hadith ini, Dr Zaghlul al-Najjar telah menjelaskan bagaimana fenomena gerhana bagi kedua-dua jasad samawi ini boleh berlaku. Semasa fenomena ini berlaku terdapat beberapa kesan kepada penghuni di bumi. Antaranya ialah burung-burung berhimpun untuk kembali kepada sarangnya.

3.3 Analisis kuantitatif mengenai kaedah ulasan hadith.

Tema	Ulasan dengan Hadith dan fakta sains	Ulasan dengan al-Qur'an dan fakta sains	Ulasan dengan Hadith , al-Qur'an dan fakta sains	Ulasan dengan fakta sains sahaja
Alam semesta	2	12	1	7
Penciptaan makhluk	2	6	9	7
Kesihatan	6	2	4	13
Jumlah	10	20	14	27

Jadual 1 : Analisis kuantitatif mengenai kaedah ulasan hadith

Tema	Dinyatakan sumber	Tidak dinyatakan sumber
Alam semesta	2	20
Penciptaan Makhluk	17	8
Kesihatan	7	18

Jadual 2 : Analisis kuantitatif mengenai kaedah ulasan dengan fakta sains

Kajian ini telah mendapati, metodologi yang digunakan oleh penulis dalam mengulas sesuatu hadith kebanyakannya adalah dengan mengemukakan fakta sains sahaja diikuti dengan ulasan berdasarkan al-Qur'an dan fakta sains dan selebihnya adalah ulasan dengan hadis dan fakta sains serta hadis, al-Qur'an dan fakta sains.

Dari segi penerangan dengan fakta sains, kebanyakan fakta yang diberikan adalah tepat tetapi tidak dinyatakan sumber.

4. 0 Kesimpulan

Kesimpulannya, terdapat perkara yang perlu diperbaiki seperti:

- 1- Fakta-fakta saintifik yang dikemukakan adalah bersifat umum dan memerlukan penerangan yang lebih terperinci.
- 2- Seharusnya penerangan fenomena astronomi perlu diuraikan dengan menggunakan gambarajah supaya fenomena yang berlaku lebih mudah difahami.
- 3- Penulis boleh menambahkan lagi hadith-hadith yang bersesuaian dalam mengukuhkan lagi uraian mengenai sesuatu topik.

Secara keseluruhannya, aspek akidah merupakan aspek utama yang ditekankan oleh penulis. Kepentingan akidah ditekankan melalui muka surat 454:

Fakta ilmiah di dalam kitab Allah Ta'ala dan sabda Rasulullah s.a.w seperti ini merupakan media paling unggul untuk mematahkan

dakwaan-dakwaan mereka sekaligus memaksa mereka untuk mengakui bahawa al-Qur'an adalah kalam Allah Yang Maha Pencipta, dan hadis adalah sabda Nabi Muhammad s.a.w yang disokong dengan wahyu Ilahi yang tidak pernah disentuh kebatilan sedikit pun.

Aspek akidah ini juga ditekankan dalam huraian topik yang kebanyakannya diakhiri dengan ayat al-Qur'an Surah an-Najm ayat 3-4 yang bermaksud:

"Dan tiadalah yang diucapkan itu(al-Qur'an) menurut kemahuan hawa nafsunya.Ucapannya itu tiada lain hanyalah wahyu yang diwahyukan kepadanya."